

寧河縣志卷之十五

風物志 凡五

風與化移物以時育舉而措之存乎其人夫風物亦
至不一矣生其間者異俗剛柔輕重異齊寒暑往來
朝日夕月者異尚毛皁鱗膏羽覈介莢羸叢者異宜
修其教溥其利而治道出焉二者邑政之大者也欣
逢

聖世協氣橫流道一風同邇遊遐泳寧雖小邑密邇
畿輔有不被潤澤而太豐美者哉語曰股之斯瘠撫之

集元 卷之十五
斯腴則轉移利導之間其必有道矣志風物

風俗

知縣洪肇楸適軍糧城失路見一樵者遣役問之掖
至輿前公問曰此何地名曰不知爾住何莊曰不知
爾何姓名亦曰不知蚩蚩木立公笑而釋之去數武
復竚望而笑公歎曰甚哉寧民之淳也其不見官吏
也久矣宜其始則茫茫然驚繼則嘻嘻然樂也今則
知識漸啟矣然其君子自愛而多迂其小人自謀而
耐苦卽間有爭競者亦不敢以公門爲捷徑云

按史公言文帝時人民樂業因其欲然能不擾亂
故百姓遂安游敖嬉戲如小兒狀而范史載劉寵
爲會稽太守狗不夜吠民不見吏龐眉皓髮之老
未嘗識郡朝史之所稱豈不懿哉若夫役繁訟多
終歲之勤半在官府雖欲其愚不可得矣君子以
是知民俗之厚也故亟登之以爲風俗之始

士尚樸實知廉隅其父兄子弟相授受師友相切劘
一以經書爲本業無作輟無營求雖困頓挫折終不
以奪其志城鄉遠近皆重讀書風晨月夕每過輒聞

雜誦聲

農
自分縣以來寧地無膏腴蘆臺大河以北與東西
各村均窪下瘠產遇豐歲每畝所收不過五六斗大
河以南地更鹵薄不任耕種卽間有成田者無雨卽
早有雨卽潦且多患蝗孽故十歲九不收而邑民素
少積聚

工
寧邑人多樸拙然終歲勤動游手好閒者絕少各
項工作所操藝事僅能成器備用無有以匠巧名者
而沿河莊戶皆以結魚網爲業得微利少可自贍

商
寧邑統分縣前後總無大商所有一二開典者來
自山右與隣近之左右縣耳市有常期列肆中祇布
米魚蝦菜蔬之類其他紬純珍饈衣履器玩及零星
雜物未嘗見也居民婚嫁諸禮需備物者必過天津
求之矣

女耕種之區親饁餉佐耘耔率以爲常城薄下濕地
晝取茅夜索絢不減幽風景象邇更勤於紡績司中
饋畢聚家之老幼姑率其婦母督其女篝燈相對星
月橫斜猶軋軋紡車聲達戶外也

冠 成童則加帽古三加禮俗以昏禮該之

昏

合兩姓先用媒妁問名已定男家爲女納徵具啟
一通用名帖備羊酒謂之訂盟女家依次回覆謂之
允盟此後男家用首飾紬帛等項爲女行聘謂之納
幣亦有用財禮布疋代幣者將娶先擇吉日具帖送
女家謂之請期娶先一日又爲女送冠帶謂之催粧
女家亦送粧奩等物謂之鋪牀臨期男請伴郎轎馬
鼓吹陪新郎至女家升堂再拜御輪授綏謂之迎親
亦有從簡者或用轎或用車迎女至門男以彩巾引

入卽日行合巹禮共筵交觶三朝廟見拜先祖拜舅
姑及伯長等輩謂之拜三或八朝或雙九女家邀婿
併女到舍款洽謂之回門至鄉村陋習相沿間有同
姓聯姻者實非禮也

喪臨歿遷寢焚冥器等物拜送門外名曰送行入室
號泣擗踊逾日送路備燈籠火炬製引鬼牌詣城隍
廟鄉間詣土地廟凡親友男女俱隨接引來家哭拜
不一三日成殮按七致祭以通遠親未弔者營葬用
丹旌彩翼冥器芻靈各隨其家之貧富以爲豐儉幸

不至有停柩之弊然居之近水者往往于河濱浮厝
經歷歲久多被淹沒暴露余每見爲之惻然因出示

嚴禁諄切曉諭其風蓋可少變云

告示
附錄

爲曉諭事照得死者之兆域卽生人之居室故葬
營善地義原取夫歸土之安置諸水濱情何殊夫
委壑之忍寧河地處低窪邑無山阜但其中高原
爽塏之區所在皆有本縣蒞任以來巡歷所至每
見河灘窪地墳塚纍纍水冲坍卸暴棺露骨揆其
由來或緣無力之家憚於遠覓高坡就近苟且安
葬迨後習以爲常恬不知怪不思古人厚其棺槨
加之封樹無非欲以計久遠妥幽室耳今乃棄之
河干任其汨沒行路爲之酸心爾等能無泚額况
當春秋展拜人人坵墓依然爾等遺骸莫辨死者
有知寧不悲愴於泉壤耶合亟出示曉諭爲此示
仰縣屬居民人等知悉嗣後遇有營葬務擇高原

深埋崇築毋得仍沿陋俗致被冲坍所有從前安葬河灘窪地亦須亟爲謀遷以免後來淹沒其暴露骸殖爾等附近居民並鄉保人等更當設法埋掩勿使枯骨漂流本縣爲人心風俗起見不惜諄切訓諭爾等各宜猛悔前非毋違特示

祭
清明節祭掃先塋懸掛紙放起花奠於墓所比戶皆然回集家廟廣設几筵合族會食歡洽竟日亦有取次分門在家會飲者七月十五日獻麻谷十月一日送寒衣年終除夕新節元旦懸像設供家家致祭遇祖先忌日請主在堂具牲醴舉家拜奠三年服闋肅儉相備獻儀祝告先靈易凶從吉不煩不怠猶有

古風

論曰班固有言民函五常之性繫水土之風氣故謂之風好惡取舍動靜無常隨君上之情欲故謂之俗而四民者又風俗之本也故學以居位闢土殖穀作巧成器通貨鬻財各有其業而風俗正矣寧邑故燕分地昔人謂其民雕悍少慮此統舉全燕就當時所見而言之非篤論也跡其崇節儉省繁飾喪紀得其哀祭祀得其敬非其俗之近古者乎若蠶桑爲經國之大務北人不習委於地鹵以故尠此大利然紡績

之利亦其次也漢食貨志云冬民旣入婦人同巷相
從夜績女工一月得四十五日是則衣食之源風化
之本舍此何以哉

歲時

正月元旦慶節祀神祭祖拜尊長幼以次相拜又親
友交相賀謂之拜年舉家食餠食前五日家衆喫隔
歲飯不忘舊之義也自一日至十日以陰晴卜歲之
豐耗元夕前後城鎮懸燈三日鄉村亦插燈相慶擊
鼓撻金陳百戲以爲樂食糖圓十六日婦女相攜走

橋摸釘以消災或請厠姑以下休咎

二月二日名龍擡頭家塾令童蒙開筆取兆人家以石灰引白龍入以小灰引黑龍出亦有以餽食祀者是月也春分民乃犁

三月上巳不知修禊士風之樸也清明祀先展墓加墳土掛紙錢多插柳戴松柏枝族衆多會食小兒亦漸放風箏是月也恒望雨

四月八日浴佛俗競上廟識禮者非之十八日聖母誕二十八日藥王誕演戲三日城及鄉祈報者填集

於道是月也望雨尤亟

五月端午人家以角黍相饋兒女佩丹符花勝門插艾葉飲雄黃菖蒲酒以辟瘟疫是月也將屆芒種先播秣夏至後十日農乃登麥謂之麥秋

六月六日炒米花曝衣曬書入伏造醬醋製麪是月也恒望晴懼霖雨傷稼

七月七夕女子候雲簇之巧者投細針浮水碗中視其影之長短粗細以占巧拙中元節詣先塋祭掃僧衆放河燈夜月乘舟持經梵作佛事以度餒魂

八月中秋人家祀先老媪祀月以月餅西瓜相饋贈
視月之明暗驗來歲元宵之晴雪白七月至此早禾
皆熟

九月重陽無登高之會而田野以其時放生畜是月
也晚秫早收

十月朔日上墳製紙衣焚墓上俗名送寒衣

十一月冬至不賀節食餛飩以象子半之義小兒放
學一日與官衙放假同

十二月八日家家食各種米豆棗栗粥名臘八粥而

廟宇亦有食粥齋者二十三日祀竈於竈陘除夕前三五日各以餠勝饋遺名饋年節換桃符門神宜春
膀子闔家不眠飲黃白酒食糖果達旦謂之守歲放
爆竹攢火圍爐以助陽氣往往徹夜不寐以兆年豐

附
方音

學讀作鴉

筆讀作彼

色讀作曬上聲

覺脚並讀作絞

藥讀作耀

摘讀作債

閣讀作稿

麥讀作買

我讀作挪上聲

墨讀作密

愛讀作乃去聲

窄讀作齋上聲

畧讀作料

耕更並讀作經

雀鵲並讀作肖上聲

北讀作卑上聲

俗肅並讀作須

白讀作拜平聲

國讀作鍋

突讀作覩

訛讀作挪

熬讀作饒

鶴讀作蒿

欲讀作愈

翟宅並讀作齋

獲讀作槐